

«Rencontre» cun Ursina Lardi

51avels Dis da film da Soloturn

■ **(1r) Il program spezial «Rencontre» als Dis da film da Soloturn undrescha mintg'onn ina personalitad dal film svizzer e mussa in schatg da sias ovras. Il «Rencontre» da quest onn è deditgà ad Ursina Lardi. Il program dat in'invista en la lavur da la persuna undrada e pussibilitescha al public da sa scuntrar cun ella a Soloturn. Tranter auter succeda quai en in discurs cun l'actura che vegn preschentà da la Lia Rumantscha.** Il program da film mussa l'actura da characters en sias rollas las pli impurtantas. Ina «carte blanche» e dus discurs publics davart sia lavur approfondeschan l'inscunter. Ses partenaris da discurs a Soloturn èn tranter auter *David Striesow* che ha accompagnà ella blers onns e la reschissura *Angela Schanelec*. Per l'emprima giada ha lieu a chaschun dals Dis da film da Soloturn in discurs per rumantsch preschentà da la Lia Rumantscha: *Sören Senn*, *Bruno Cathomas* e *Mariano Tschuor* discurren cun *Ursina Lardi* davart sia via dal Grischun or en il mund.

Ursina Lardi è actura cun corp ed olma. La marusa ardenta gioga ella cun la medema passiuon sco la consorta cugliunada. Ella represchenta savens dunnas che vegnan messas a l'emprova. En il drama da guerra «Lore» (2013) è ella ina mamma che sto laschar enavos ses uffants a la front. En il crimi «Der Kameramör-

der» (2010) scuvra ella che ses ex-ami è in sadist malsaun. En «Canzun Alpina» (2008) parturescha ella in uffant illegi-

tim cun pel stgira – sco scolasta en in vitg muntagnard grischun. Emoziuns persas interpretscha ella a moda virtuosa e cum-

plexa. En la saga da famiglia premiada «Das weisse Band» (2009) da Michael Haneke gioga ella ina barunessa ritga, ma

disfortunada. La rolla sco dunna en speranza che maina mo superfizialmain ina relaziun intacta en «Traumland» ha purtà ad ella l'onn 2014 il Premi dal film svizzer sco meglra actura.

Ursina Lardi gioga sias rollas cun intensitad e preschientscha. Il «Rencontre» mussa ina schelta da dudesch films, en ils quals ella ha ina rolla impurtanta. Tranter auter pon ins vesair per l'emprima giada sin taila «Mein langsames Leben» (2001) dad Angela Schanelec e la premiera dal drama da relaziun «Sag mir nichts» (2016) dad Andreas Kleiner, nua ch'ella gioga ensemen cun Roeland Wiesnekker.

Ulteriuras infurmaziuns e program detaglià:
www.solothurnerfilmtage.ch e
www.liarumantscha.ch



Il «Rencontre» da quest onn als Dis da film da Soloturn è deditgà ad Ursina Lardi.

MAD

Baterlada Lia Rumantscha

Mariano Tschuor (SRG SSR) discurre cun ils acturs Ursina Lardi e Bruno Cathomas e cun il reschissur Sören Senn davart lur carieras che han cumenzà en il Grischun ed als han manà fin a Berlin e Cologna. Dumengia, ils 24 da schaner 2016, 17.30–18.30 en il Kino Palace.